

BASES DA CONVOCATORIA PÚBLICA DE SUBVENCIONS MUNICIPAIS, PARA ACTIVIDADES DE CARÁCTER EDUCATIVO, CULTURAL E DEPORTIVO A ENTIDADES SEN ÁNIMO DE LUCRO DO CONCELLO DE ARZÚA.

Primeiro.- Disposicións xerais.

Estas bases teñen por obxecto establecer os criterios e o procedemento para conceder as subvencións municipais, de acordo cos principios de obxectividade, publicidade, libre concorrència e igualdade, para a realización de actividades que suplan ás atribuídas á competencia municipal; ou que, en xeral, contribúan ó fomento dos intereses xerais ou sectoriais dos veciños do municipio.

Rexeranse polo disposto na Ordenanza Xeral de Subvencións do Concello de Arzúa, aprobada inicialmente polo Pleno do Concello en sesión celebrada o día 28 de febreiro de 2005; e cuxa aprobación definitiva e texto da ordenanza foi publicada no BOP n.º 95 de data 28 de abril de 2005.

Segundo.- Obxecto e imputación orzamentaria

Con cargo ás correspondentes dotacións orzamentarias, o obxecto das axudas e subvencións comprenderá para o presente ano 2007:

2.1.- Promoción de actividades Educativas: Inclúe as actuacións culturais, educativas ou deportivas a realizar nos centros educativos públicos sitos no termo municipal de Arzúa, ben polos propios centros educativos, ben polas Asociacións de Alumnos dos centros, ben polas Asociacións de Pais de Alumnos dos mesmos.

As subvencións outorgadas por actuacións recollidas neste apartado non poderán superar, na súa totalidade, a cantidade de 2.805 euros, incluída na partida 422.489.00 do Orzamento Xeral do Concello de Arzúa para o ano 2007.

2.2- Promoción de actividades culturais: Entendéndose por elas actividades tales como celebracións, homenaxes, exposicións, publicacións, concursos, certames, mostras, excursións, eventos musicais, encontros, conferencias, estudos, e, en xeral, calquera actividade de conservación, promoción e divulgación dos valores culturais, a realizar por asociacións veciñais ou culturais que realicen actividades de carácter cultural, segundo se desprenda dos seus estatutos.

As subvencións outorgadas por actuacións recollidas neste apartado non poderán superar, na súa totalidade, o crédito inicial da partida 451.489.00 do Orzamento Xeral do Concello de Arzúa para o ano 2007 (9.500 euros).

2.3.- Promoción de actividades deportivas: Neste apartado foméntanse escolas, cursos, competicións, campus deportivos, e en xeral, actividades relacionadas coa promoción do deporte; a realizar por clubs ou outras asociacións que realicen actividades deportivas, segundo se desprenda dos seus estatutos.

As subvencións outorgadas por actuacións recollidas neste apartado non poderán superar, na súa totalidade, o crédito inicial da partida 452.489.00 do Orzamento Xeral do Concello de Arzúa para o ano 2007 (25.900 euros).

Terceiro.- Destinatarios

3.1.- Poderán concorrer e optar a estas subvencións as entidades, organismos ou asociacións xuridicamente constituídas que cumpran os seguintes requisitos e fins:

- 1) Carecer de fins de lucro.
- 2) Estar debidamente inscritos no Rexistro Municipal de Asociacións e Entidades do Concello nos termos previstos no artigo 236, parágrafos 2, 3 e 4 do vixente ROF; ou telo solicitado na data da petición.
- 3) Estar ao día das xustificacións de subvencións concedidas no exercicio anterior ou ter solicitado unha prórroga debidamente xustificada e aprobada polo Concello.
- 4) Non adebedar cantidade algunha ao Concello de Arzúa por calquera concepto.
- 5) As demais obrigas reguladas nos artigos 7 e 8 da Ordenanza Xeral de Subvencións do Concello de Arzúa.

Cuarto.- Actuacións a subvencionar.

4.1.- As subvencións e axudas que se outorguen ao abeiro da presente convocatoria, terán como finalidade a realización de actividades de carácter educativo, social, cultural e deportivo.

4.2.- Non poderán ser obxecto de axuda ou subvención na correspondente convocatoria as actividades subvencionadas no mesmo exercicio, a través doutras convocatorias de subvencións ou plans doutras AAPP, cando o importe destas últimas cubra o 100% da actividade a realizar. En caso contrario, poderá ser subvencionable e complementado o importe da actividade na contía restante ata chegar ao total do importe da actuación.

Quinto.- Prazo de solicitude.

O prazo para presenta-las solicitudes será de 30 días naturais, no rexistro xeral da Corporación, a partir do día seguinte á publicación no BOP, en horario de nove a catorce horas.

No caso de solicitudes defectuosas ou incompletas, concederáse un prazo de dez días para a súa corrección ou emenda, arquivándose, sen máis trámite, cando non se emenden as deficiencias advertidas no prazo sinalado. Non se terán en conta as solicitudes presentadas fora dos prazos fixados na convocatoria.

Sexto.- Documentación

As solicitudes de subvención ou axuda deberán presentarse no modelo normalizado nº1 que se facilitará no Rexistro Xeral do Concello, que irá achegada dos seguintes documentos:

- 1) Fotocopia compulsada do cartón do Código de Identificación Fiscal (CIF) da entidade.
- 2) Fotocopia compulsada dos estatutos da entidade.
- 3) Certificación de datos bancarios da entidade solicitante, segundo modelo normalizado nº3.
- 4) Fotocopia compulsada da tarxeta do número de identificación fiscal (NIF) do representante legal.
- 5) Certificación acreditativa do acordo de solicitude e nomeamento de representante, no seu caso, para as relacións co Concello, segundo modelo normalizado nº2 que se facilitará no Concello.
- 6) Declaración xurada ou certificación do representante da entidade, de acepta-las condicións da convocatoria.
- 7) Memoria explicativa da actividade que se vai a desenvolver, indicando en cada unha delas:
 - Nome da actividade e explicación do seu contido
 - Duración (data ou datas de realización)
 - Lugar ou lugares onde se desenvolve
 - Orzamento de gastos e ingresos e forma de financiamento previsto (mediante fondos propios, doutros organismos públicos ou privados...)
 - Obxectivos e fins que se pretenden coa realización da mesma
- 8) Documento que acredite o número de socios que compoñen a entidade no momento da solicitude.
- 9) Declaración responsable de non estar incurso en ningunha das causas que determina o artigo 13.2 da Lei 38/2003, Xeral de Subvencións; mediante o modelo normalizado nº 6.

Non será precisa a presentación dos documentos ós que fan referencia os puntos 1), 2), 3) e 4); sempre que obren en poder da Administración.

Sétimo.- Instrución do procedemento e comisión técnica de valoración

A instrución do procedemento de concesión de subvencións corresponde ao persoal dos servizos administrativos dos departamentos de Cultura, Deportes e Educación. Realizarán de oficio cantas actuacións estimen necesarias para a determinación, coñecemento e comprobación dos datos en virtude dos cales deberá formularse a proposta de resolución.

A comisión técnica de valoración das subvencións estará constituída, para cada tipo de subvención, polo Sr. Alcalde-Presidente, o/s Concelleiro/s en materia de Deportes, Cultura e Educación e un traballador ou funcionario da área determinada nomeado polo Alcalde-Presidente. Dita comisión emitirá informe concretando o resultado da avaliación das solicitudes, motivando o resultado final da valoración en base á aplicación dos criterios establecidos no artigo seguinte.

Oitavo.- Órgano competente e criterios para a concesión de subvencións.

8.1.- A Xunta de Goberno Local, previa proposta da Comisión técnica avaliadora e informe de intervención; será o órgano competente para a resolución das peticións de axudas.

8.2.- Os criterios a ter en conta para a concesión das subvencións serán os seguintes:

- Representatividade da entidade peticionaria no Concello, atendendo ó número de actividades desenvolvidas ou proxectadas de xeito conxunto con varias entidades: ata 10 puntos.
- Grao de interese xeral ou sectorial da actividade que se propoña realizar e a súa coordinación e complementariedade cos programas municipais: ata 10 puntos.
- Número de posibles beneficiarios directos ou indirectos: 10 puntos.
- Número de actividades propostas e número de equipos e categorías dos mesmos (no caso de actividades deportivas): ata 20 puntos.
- Carácter periódico ou permanente das actividades desenvolvidas, tendo en conta os actos puntuais que animan á participación social mediante actividades culturais, deportivas ou educativas: ata 10 puntos.
- A utilización da lingua galega na realización e na promoción de actividades: ata 10 puntos.
- Forma de financiamento: subvencións ou axudas recibidas doutros organismos públicos ou privados. Primarase o maior esforzo de financiamento propio: ata 10 puntos.
- A relación de actividades co mantemento das tradicións ou manifestacións culturais e artísticas locais (no caso de actividades culturais): ata 20 puntos.

8.3.- Posteriormente, previos os informes da Comisión avaliadora e de fiscalización emitido pola intervención municipal, a Xunta de Goberno Local adoptará o acordo que proceda.

8.4.- O prazo máximo para resolver e notifica-la resolución do procedemento non poderá exceder os tres meses contados a partir da publicación da convocatoria. O vencemento deste prazo sen notificarse a resolución lexítima ao interesado para entender desestimada a solicitude por silencio administrativo. A falta de notificación da resolución producirá a desestimación e contra a desestimación, expresa ou presunta, poderán formularse os recursos que procedan.

Noveno.- Obrigas do beneficiario

Son obrigas do beneficiario as sinaladas no artigo oitavo da Ordenanza Xeral de Subvencións do Concello de Arzúa e que se relacionan a continuación:

- 1.- Cumprir o proxecto ou actividade que fundamenta a concesión da subvención.
- 2.- Xustificar ante o Concello de Arzúa, o cumprimento dos requisitos e condicións, así como a realización da actividade e finalidade que determine a concesión da subvención.
- 3.- Someterse ás actuacións de comprobación e control que sexan debidamente requiridas polos órganos municipais, aportando canta información lle sexa requirida no exercicio destas actuacións e que estean relacionadas coa concesión da subvención.
- 4.- Comunicar ao Concello a obtención doutras subvencións, axudas, ingresos ou recursos que financien as actividades subvencionadas. Esta comunicación deberá efectuarse tan axiña como se coñeza, e en todo caso, con anterioridade á xustificación da aplicación dada ós fondos percibidos.

5.-Acreditar con anterioridade a ditarse a proposta de resolución que se atopa ao corrente no cumprimento das súas obrigas tributarias e da Seguridade Social.

6.- Dispor dos libros contables, rexistros dilixenciados e demais documentos debidamente auditados nos termos esixidos pola lexislación mercantil e sectorial aplicable, ou no seu caso, os estados contables que garantan o axeitado exercicio das facultades de comprobación e control.

7.- Conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das actuacións de control e comprobación.

8.- Deberán dar a axeitada publicidade do carácter público de financiamento de programas, actividades, inversións ou actuacións de calquera tipo que sexan obxecto de subvención, coa expresión "subvenciona o Concello de Arzúa".

9.- Proceder ao reintegro dos fondos públicos percibidos nos supostos contemplados no art. 37 da LXS.

Décimo.- Pagamento das subvencións concedidas e xustificación dos gastos

10.1.- Rematado o prazo de presentación de solicitudes procederase ao exame e valoración das mesmas mediante a aplicación dos criterios relacionados no artigo sétimo; procedendo a Xunta de Goberno Local á resolución das peticións de axudas.

O outorgamento da subvención, así como a contía a subvencionar, será notificado aos interesados.

10.2.- O pagamento efectuarse da seguinte maneira:

- 80% da contía a subvencionar dende a notificación do outorgamento da axuda, previa solicitude.
- 20% unha vez xustificada a subvención, de acordo co disposto nos apartados seguintes.

De conformidade co artigo 24 da Ordenanza Xeral de Subvencións, non se esixirá a previa constitución de garantía para a realización de pagos anticipados, por concorrer circunstancias de precariedade económica das entidades que habitualmente veñen solicitando as axudas, que xustifican a excepción da mesma.

10.3.- O importe a xustificar non será inferior ao 130% do importe da subvención concedida polo Concello. Cando para a mesma finalidade se obtiveran axudas doutras AAPP deberá xustificarse un importe, non inferior ao 130% antes indicado, igual á suma das axudas obtidas.

10.4.- O xustificación insuficiente dará lugar á redución proporcional da subvención no importe non xustificando.

10.5.- A xustificación da subvención, ante a Alcaldía-Presidencia, farase coa presentación no Rexistro Xeral do Concello dos seguintes documentos:

- a) Modelo normalizado nº 4, debidamente cuberto
- b) Certificado do secretario/a co Vº e Pr. do/a Presidente/a, segundo Modelo normalizado nº 5
- c) Facturas orixinais debidamente cubertas ou fotocopias compulsadas comprensivas dos gastos realizados no exercicio da actividade, cos requisitos establecidos pola lexislación do IVE e o Regulamento de Facturación; ou outros documentos de valor probatorio. Para o caso de que no desenvolvemento da actividade se satisfagan rendementos de actividades profesionais, deberá acompañarse a factura, ademais de cos requisitos establecidos no Regulamento de Facturación, coa retención correspondente en concepto de Imposto sobre a Renda das Persoas Físicas, en cumprimento do previsto no artigo 93 do Real Decreto 1775/2004, polo que se aproba o Regulamento do Imposto sobre a Renda das Persoas Físicas.

As subvencións que teñan por finalidade a realización de actividades que xeren gastos de persoal, xustificaranse por medio de facturas ou nóminas orixinais, ou fotocopias compulsadas. Igualmente, deberán achegarse as fotocopias dos NIF pertencentes ás persoas que imparten cursos, clases, conferencias, etc; así como árbitros, monitores, adestradores, etc.

Non se admitirán como xustificantes de gasto:

- as cantidades satisfeitas ó Concello polo uso das instalacións deportivas, culturais ou ocupación de dominio público.
- os relacionados no parágrafo 2 do artigo 22 da Ordenanza Xeral de Subvención.
- os gastos en investimento como mobiliario, vehículos, etc.
- os gastos en bebidas alcohólicas e tabacos.

Os xustificantes de gasto deberán facer mención ás actividades financiadas, e estas coincidirán coas expostas na memoria que se acompañou á solicitude. Só se considerará gasto a subvencionar o efectivamente pagado. Se realizada a actividade e rematado o prazo para xustificar, só se acredita o pago dunha parte dos gastos, aos efectos de perda do dereito ao cobro, aplicarase o principio de proporcionalidade.

- d) Certificación do representante da entidade subvencionada, de ter cumprida a finalidade da subvención ou axuda, mediante a realización das actividades.
- e) Certificados acreditativos, expedidos polos organismos oficiais correspondentes, de atoparse ao corrente no cumprimento das obrigas tributarias coa Administración Tributaria e coa Seguridade Social. Admitirase a substitución destes documentos por unha autorización ao Concello de Arzúa para obter directamente da Axencia Tributaria e da Seguridade Social os devanditos certificados. A tal fin cumprimentaranse os modelos normalizados números 7 e 8.

Cando o importe da axuda concedida non supere a cantidade de 3.000 euros, as certificacións anteriores poderán ser substituídas pola presentación de declaracións responsables, asinadas polo secretario co visto e prace do Presidente.

- f) Xustificante de ter incluído no cartel publicitario do evento/actividade a expresión "*subvencionada o Concello de Arzúa*".

Se a documentación xustificativa se estima correcta procederase ao pago do 20% restante do importe concedido, previa notificación ó interesado.

A aprobación da xustificación presentada polos beneficiarios e a ordenación do pago da subvención corresponde ao Alcalde-Presidente, previo informe de intervención.

O aboamento da subvención farase efectivo por medio de ingreso na conta bancaria da entidade financeira sinalada polo beneficiario na documentación achegada.

Os documentos xustificativos corresponderanse con gastos feitos durante o ano natural do exercicio 2.007 ata o límite da data de finalización do prazo de xustificación. Dito prazo rematará o día 30 de novembro de 2007, salvo que por causas debidamente xustificadas se solicítase prórroga e fose concedida pola Xunta de Goberno Local. En todo caso, a prórroga deberá solicitarse antes do remate do prazo de xustificación, e en ningún caso poderá ser obxecto de prórroga un prazo xa vencido.

10.6.- Os beneficiarios quedan sometidos á responsabilidade e ao réxime sancionador establecido na Lei Xeral de Subvencións.

Undécimo.- Colaboración do beneficiario.

O beneficiario está obrigado a facilitar tanta información lle sexa requirida polo Concello de Arzúa e polo Consello de contas de Galicia, someténdose á responsabilidade e ao réxime sancionador establecido na Lei Xeral de Subvencións, e no seu caso, ao disposto no vixente código penal.

Décimo segundo.- Control e revogación da subvención

Estarase ao disposto no Título III da ordenanza Xeral de Subvencións do Concello de Arzúa.

DISPOSICIÓN FINAL

Para o non previsto nesta convocatoria será de aplicación a Lei Xeral de Subvencións, Ordenanza Xeral de Subvencións do Concello de Arzúa e Bases de Execución do Orzamento do exercicio 2007.